


POLO DEREITO DE TODAS E TODOS A UNHA XUBILACIÓN DIGNA



Nos últimos meses os medios de comunicación veñen publicando informacións sobre reunións entre o Ministerio de Seguridade Social, a patronal, CCOO e UGT para facer cambios en materia de pensións sobre xubilación parcial e coeficientes redutores para anticipar a idade de xubilación.



Temos que denunciar que estas negociacións se están a dar de forma escurantista e ilegal, no chamado diálogo social, fóra dos organismos oficiais de representación institucional tripartita, sen respectar os dereitos de representación que temos centrais sindicais máis representativas e maioritarias, como a CIG.



Estamos ante unha nova reforma das pensións, cando apenas transcorreron 14 meses desde a última, na que se aumentou aos 29 anos os anos para o cálculo da pensión. Reforma que se veu sumar á feita no 2011, acelerando todas elas a caída progresiva da contía das pensións que vimos padecendo nos últimos anos, e que vai camiño xa do 25% de perda na contía da pensión a cobrar, por causa da ampliación da idade de xubilación dos 65 aos 67 anos e do aumento do período de cálculo do 15 aos 25 anos.

Caída das pensións xeneralizada que, no caso das mulleres, afonda máis a fenda de xénero.



Por riba, as sucesivas reformas laborais, que estenden cada vez máis a precariedade, e os permanentes cambios nas normas que penalizan a xubilación anticipada, fan máis graves as discriminacións para acceder á xubilación parcial, xa que só determinados colectivos de persoas traballadoras poden xubilarse aos 61 anos.



Ademais, sufrimos permanentes atrancos para o recoñecemento de coeficientes redutores da idade de xubilación nas profesións de maior penosidade, perigosidade e insalubridade. Estamos a falar de moitos sectores de actividade e postos de traballo como son os do mar, servizo de gardacostas, transporte, construción, pedra, construción de tuneles, canteiras e talleres de transformación, coidados, dependencia, sector sanitario, sociosanitarios, ambulancias, bombeiros e axentes forestais, limpeza hospitalaria e industrial, seguridade privada, plantas de tratamento de lixo, sector naval, eólico e para as persoas traballadoras en postos de traballo en cadea, etc.



TRABALLO DIGNO

Confederación Intersindical Galega

www.cig.gal



Desde a CIG exiximos “luz e taquígrafos” e demandamos transparencia nestas negociacións; non podemos permitir que, unha vez máis, aproben “pola porta de atrás” unha nova reforma que, chea de propaganda, envolverá recortes de dereitos e non dará solución ás reivindicacións que desde hai anos vimos reclamando en moitos destes sectores de actividade e postos de traballo nos que estamos condenados a prolongar a vida


laboral en actividades penosas e de grande esforzo físico e psíquico.



Temos claro que non se pode seguir na inxustiza de prolongar a vida laboral, impedindo chegar á xubilación en condicións de poder desfrutala, como tampouco se pode seguir negando a entrada da xente nova ao mundo do traballo, cronificando a emigración e o paro xuvenil entre os e as menores de 25 anos.

POR TODO ISTO, E ANTE O QUE SE ESTÁ A NEGOCIAR, DESDE A CIG NOS MOBILIZAMOS PARA EXIXIR AO GOBERNO ESPAÑOL:

- 1.- Restabelecer o dereito a **xubilación parcial aos 61 anos** para todas as persoas traballadoras e sectores, non só para os da industria manufactureira.
- 2.- **Xubilación aos 65 anos**, e voluntaria a partir de ter 35 anos cotizados, reais ou **por aplicación dos coeficientes redutores en determinadas profesións**.
- 3.- Recoñecemento e mellora dos procedementos para acceder aos coeficientes redutores para **anticipar a xubilación sen recortes e con todos os dereitos**.
- 4.- Todas estas negociacións teñen que ter lugar nos organismos públicos e **deben respectarse os dereitos legais de participación** dos sindicatos –como a CIG– máis representativos e maioritarios.



Concentracións 9 de maio:

Delegación do goberno **A Coruña** ás 11 horas

Subdelegación do goberno **Lugo** ás 11 horas

Subdelegación do goberno **Ourense** ás 11 Horas

Subdelegación do goberno de **Pontevedra** ás 11 horas



XUBILACIÓN DIGNA



Confederación Intersindical Galega

www.cig.gal